

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 18/2

26 հուլիսի 2016թ.

Քննարկվեց «Այվարմ» ՍՊԸ գանգատը ՀՀ ԿԱ ՊԵԿ ՕՀՎ 05.05.2016թ. թիվ 1412325 վարչական ակտի դեմ:

«Այվարմ» ՍՊԸ գանգատում բերված փաստարկները.

ՀՀ ԿԱ պետական եկամուտների կոմիտեի օպերատիվ հետախուզության վարչության աշխատակիցների կողմից կազմվել է 05.05.2016թ. թիվ 1412325 ակտը, որի արդյունքում «Այվարմ» ՍՊԸ-ն առանց լիցենզիայի լիցենզավորված գործունեությամբ զբաղվելու հիմնավորմամբ տուգանվել է 500.000 դրամով: Ակտը կազմվել է առողջապահության նախարարության հարկային մարմին ուղարկած գրության և կից ՀԴՄ կտրոնների հիման վրա:

Կազմված ակտն անօրինական է հետևյալ պատճառաբանությամբ.

1. Բողոքարկվել է լիցենզիայի կասեցման մասին առողջապահության նախարարի որոշումը, գանգատաբերը անձամբ եղել է փոխնախարար Տ.Սահակյանի մոտ, որը խոստացել է նախարարի նոր որոշումով «Այվարմ» ՍՊԸ-ի կասեցումը հանել: Այս մասին գանգատաբերը տեղյակ է պահել հարկային մարմնի աշխատակիցներին: Իրեն համար անհասկանալի նոր նամակ է ուղարկվել նախարարի ստորագրությամբ առողջապահության տեսչության կողմից առանց փոխնախարար Տ.Սահակյանի իմացության, որով արդեն պահանջվել է կասեցման ժամանակ գործունեությունը դադարեցնելու համար ապօրինի գործունեություն կիրառելու համար ենթարկել վարչական պատասխանատվության:

2. Քանի որ ստացվել է հանձնաժողովի նախագահ փոխնախարար Տ.Սահակյանի պատասխանը, ում վրա է դրված նաև առողջապահության տեսչության գործունեության պատասխանատվությունը, որ շուտով կասեցման որոշումը կչեղարկվի, գանգատաբերը համոզված է եղել, որ նախարարությունն իր սխալը կուղղի և ժամանակավոր կասեցումը կվերացվի: Ուստի, առանց այդ էլ դեղատնային կրպակի ցածր շրջանառությանը, ինչպես նաև հաշվի առնելով դեղերի ժամկետները և այլ շատ հանգամանքներ ընկերությունը շարունակել է կրպակի աշխատանքը:

Շուրջ 15 տարի դեղատնային կրպակը հարկային որևէ պարտականության թերացում չի ունեցել՝ խիստ անհավասար պայմաններում մեծ դեղատների հետ մրցակցության մեջ լինելով հանդերձ:

Ելնելով վերոգրյալից՝ գանգատաբերը խնդրում է անվավեր ճանաչել «Այվարմ» ՍՊԸ-ի նկատմամբ կազմված ՀՀ ԿԱ ՊԵԿ ՕՀՎ 05.05.2016թ. թիվ 1412325 վարչական ակտը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ԿԱ ՊԵԿ ՕՀՎ 05.05.2016թ. թիվ 1412325 վարչական ակտով մասնավորապես արձանագրվել է հետևյալը.

Հիմք ընդունելով ՀՀ առողջապահության նախարարի կողմից ուղարկված գրությունը՝ ՀՀ ԿԱ ՊԵԿ ՕՀՎ պետի 26.04.2016թ. թիվ 1412325 որոշման համաձայն ՕՀՎ 21-րդ բաժնի աշխատակիցների կողմից իրականացվել են օպերատիվ-հետախուզական միջոցառումներ, որի արդյունքում պարզվել է, որ Վանաձոր քաղաքի Տիգրան Մեծի պող. 48/2 հասցեում գտնվող «Այվարմ» ՍՊ ընկերությանը պատկանող դեղատունը առանց համապատասխան լիցենզիայի իրականացնում է դեղատնային գործունեություն:

Ընկերության տնօրեն Սեյրան Վարդերեսյանը հայտարարել է, որ ՀՀ առողջապահության նախարարության կողմից ուսումնասիրության հետևանքով հայտնաբերվել են թերություններ, որի արդյունքում 05.02.2016թ. ՀՀ առողջապահության նախարարի թիվ 316 Ա հրամանով կասեցվել է «Այվարմ» ՍՊԸ-ին ՀՀ առողջապահության նախարարության կողմից 2013թ. ապրիլի 5-ին տրված դեղատնային գործունեություն իրականացնելու թիվ Կ-ԴԳ-001649 լիցենզիայի գործողությունը: Ս.Վարդերեսյանը հայտնել է նաև, որ պարզաբանման նպատակով այցելել է առողջապահության նախարարություն, որտեղ պատասխանել են, որ տեղի է ունեցել թյուրիմացություն և կվերացնեն կասեցման հիմքերը: Հաշվի առնելով այդ հանգամանքը նա շարունակել է դեղատան գործունեությունը՝ տեղյակ չլինելով, որ դեղատան լիցենզիայի գործողությունը կասեցված է:

Ելնելով վերոգրյալից և ղեկավարվելով «Հարկերի մասին» ՀՀ օրենքի 26-րդ հոդվածի դրույթներով վարչական ակտով լրացուցիչ վճարման է առաջադրվել ընդամենը 550.000 դրամ:

Վերոգրյալի կապակցությամբ հարկ է նշել, որ «Հարկերի մասին» ՀՀ օրենքի 26-րդ հոդվածի համաձայն՝ օրենքով սահմանված լիցենզավորման կամ ծանուցման ենթակա գործունեությունն առանց լիցենզիայի կամ առանց ծանուցման իրականացնելու կամ առանց թույլտվության կամ առանց լիցենզիայի ընդերքը կամ բնական պաշարներն օգտագործելու դեպքերում կազմակերպություններից և անհատ ձեռնարկատերերից գանձվում է տուգանք՝ լիցենզիայի կամ թույլտվության տրման կամ ծանուցվող գործունեության համար օրենքով սահմանված պետական տուրքի դրույքաչափի տասնապատիկի չափով, բայց ոչ պակաս հինգ հարյուր հազար դրամից:

Քննարկվող դեպքում ՀՀ ԿԱ ՊԵԿ ՕՀՎ պետի 26.04.2016թ. թիվ 1412325 որոշման համաձայն իրականացված օպերատիվ-հետախուզական միջոցառումների արդյունքում հիմնավորվել է «Այվարմ» ՍՊԸ կողմից առանց համապատասխան լիցենզիայի դեղատնային գործունեություն իրականացնելու փաստը: Մասնավորապես, իրականացված օպերատիվ-հետախուզական միջոցառումների ընթացքում արձանագրվել է, որ ընկերության կողմից իրականացվում է դեղատնային գործունեություն, այն դեպքում, երբ ՀՀ առողջապահության նախարարի թիվ 316 Ա հրամանով «Այվարմ» ՍՊԸ-ին 2013թ. ապրիլի 5-ին տրված դեղատնային գործունեություն իրականացնելու թիվ Կ-ԴԳ-001649 լիցենզիայի գործողությունը կասեցվել է: Այսինքն, «Այվարմ» ՍՊԸ կողմից առանց լիցենզիայի իրականացվել է օրենքով սահմանված լիցենզավորման ենթակա գործունեություն, որի համար ՀՀ ԿԱ ՊԵԿ ՕՀՎ 05.05.2016թ. թիվ 1412325 վարչական ակտով կիրառվել է «Հարկերի մասին» ՀՀ օրենքի 26-րդ հոդվածով նախատեսված պատասխանատվությունը:

Այլ ապացույցներ, որոնք կհիմնավորեն ընկերության մեղքի բացակայության հանգամանքը, սույն գործում առկա չեն:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Ղ Ո Ւ Մ Է՝

ՀՀ ԿԱ ՊԵԿ ՕՀՎ 05.05.2016թ. թիվ 1412325 վարչական ակտը թողնել անփոփոխ, իսկ գանգատը՝ մերժել:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել տեսչական մարմինների միասնական բողոքարկման հանձնաժողով կամ ՀՀ վարչական դատարան:

Հանձնաժողովի նախագահ՝



Վ.ՄԻՐՈՒՄՅԱՆ